

Pagpangitag Pagpabuhi

ADLAW 9 —AKO BA NAGBUHAT ALANG SA DIOS—O SIYA BA NAGBUHAT PINAAGI KANAKO?

“Namatay ako kauban ni Cristo sa krus. Dili na ako ang nagakinabuhi karon, kondili si Cristo na ang nagakinabuhi kanako.” (Galatia 2:20).

Gilalang alang sa Maayong Binuhatan

Si Zsolt, ug ka estudyante sa tiyologo gikan sa Austria, nasagmuyo. Gidapit siya sa pagwali didto sa Kenya, apan 30 ra ka buok ang nanambong matag gabii atol sa unang semana. Siya naglaum nga daghan pa unta. Ingon nga napakyas, siya nagmokmok sa iyang kwarto sulod sa upat ka oras. Ginalatad tanan niyang langiob atubangan sa Dios, siya nagtugyan sa iyang kaugalingon sa tibuok niyang pagkatawo ug naghulat. Siguro siya nga ang Dios namati, bisan pa ang mga kahadlok ug pagduhaduha sa gihapon nagsamok niya. Unya miabot ang tigum sa gabii: 600 ka mga tawo ang nangabot! Unya miabot og 700 pagkataud-taud, unya 1,000. Sa kataposan, 39 ang nabautismohan pinaagi sa grasya sa Dios.

Bisan kanus-a kita magasulay og dagkung mga butang alang sa Dios, kita mangatubang og usa ka importante nga pangutana: Ako ba nagabuhat **alang** sa Dios uban sa akong **tawhanon** nga mga abilidad? O ang Dios ba nagabuhat **pinaagi** kanako uban sa Iyang **diosnon** nga mga abilidad?

Ang Biblia nagahisgot niini nga misteryo kon giunsa sa usa ka kusgan nga Dios paglihok pinaagi sa mga maluya nga tawo. “Kay kita iyang mga binuhat, hinimo diha kang Cristo Jesus alang sa mga maayong binuhatan nga gilaraw nang daan sa Dios, aron nga niini managgawi kita” (Efeso 2:10). Kini nga bersikulo nagatumbok ngadto sa duha ka “mga buhat.” Una, ang Dios “naglalang kanato diha kang Cristo Jesus.” Kini mao ang bag-ong kinabuhi nga Iyang gihatag kanato diha kang Cristo. Unya ang Dios nagabuhat og ikaduha nga buhat alang kanato: ang “mga maayong buhat” nga Iyang nang daan giandam alang kanato nga pagahimoon. Unsaon nato sa pagpuyo aron nga ang Dios makabuhat niini nga mga buhat pinaagi kanato?

1. **Pagkinabuhi diha sa Balaang Espiritu:** “Hangtud sila managpakadawat sa Espiritu, dili sila makaamgo unsay mabuhat sa Dios pinaagi kanila” (*Ye Shall Receive Power*, p. 286).
2. **Pagkinabuhi diha sa bug-os nga pagtugyan kang Cristo:** “Siya nga magatugyan sa iyang kaugalingon sa bug-os ngadto sa Dios magiyahan sa diosnong kamot. . . . Ingon nga siya nagatipig sa mga pagtulon-an sa diosnong kaalam, usa ka sagrado nga sugo igasalig kaniya” (*The Acts of the Apostles*, pp. 283, 284).

Pinaagi sa pagtapos sa mga buhat nga giandam sa Dios alang kanato, kita nagatubo diha sa pagtoo, ug ang atong espiritohanon ug utoknon nga mga abilidad maugmad. Bisan ang atong mga kapakyasan nagahupot sa mga bilihon nga pagtulon-an, kay kita nagakat-on nga walay tawhanong paningkamot makalampos nga wala ang Dios diha sa sentro. “Ang pagwali sa kalibutan walay kapuslanan kon wala ang makanunayon nga presensya ug tabang sa Balaang Espiritu” (*The Desire of Ages*, p. 671).

Dili Pinaagi sa Kusog, Ni Pinaagi sa Gahum

Ug ingon lang nga ang mga magwawali kinahanglan mahatagan og gahum pinaagi sa Espiritu sa Dios, nan kini uban sa mga magsusulat sa espiritohanong materyales: “Kon ang kaluwasan sa Dios anaa sa usa nga nagasulat sa papel, ang susama nga espiritu mabatyagan sa magsusulat. . . . Apan ang usa ka papek nga sinulat sa dihang ang magsusulat wala nagkinabuhi nga bug-os alang sa himaya sa Dios, wala sa bug-os nadeboto Kaniya, ang mga manolunda mobati sa kakulangan diha sa kagul-anan. Sila molingiw ug dili motuga sa magbabasa uban niini

tungod ang Dios ug ang Iyang Espiritu wala niini. Ang mga pulong maayo, apan kini kulang sa init nga impluwensya sa Espiritu sa Dios" (*EGW Letters and Manuscripts*, vol. 1, p. 532).

Kini nga prinsipyo matuod alang sa tanang bulohaton, bisan ministryo, pagpanudlo, pagpangulo og usa ka proyekto sa misyon, pagbansay og usa ka bata, o bisan unsang butanga. "Dili ang gahum nga nagagula gikan sa katawhan maoy mopahimo sa buhat nga malampuson, kini mao ang gahum sa langitnong mga binuhat nagabuhat kauban sa tawhanong ahente ang nagadala sa buhat ngadto sa kahingpitan" (*Christian Service*, p. 260).

Bisan ang tawong si Jesus nga Nasarethon nagsalig adlaw-adlaw sa Iyang kadugtongan sa langit. Siya nag-ingon sa mga tinun-an, "Wala ka ba diay magtoo nga ako anaa sa Amahan ug nga ang Amahan ania kanako? Ang mga pulong nga akong gisulti kaninyo, wala ko isulti kini sa kinaugalingon kong pagbulot-an; hinonoo ang Amahan nga nagapuyo sa sulod nako, siya mao ang nagahimo sa iyang mga buhat" (Juan 14:10). O tan-awon nato si apostol Pablo. Giunsa sa usa ka tawo sa pagpadayon sa di-matuohan nga dakung buhat nga misyon? Siya nag-ingon, "Gilansang ako sa krus uban kang Cristo; dili na ako ang nabuhi, kondili si Cristo ang nabuhi sa sulod nako" (Galatians 2:20). Si Pablo naghurar sa iyang pagbulot-an ug nagtugot kang Cristo sa pagpangulo sa iyang kinabuhi. Siya nagsaysay, "Kay dili ko pangahasan ang paghisgot sa bisan unsa gawas lamang sa nabuhat ni Cristo pinaagi kanako sa pagdani sa mga Gentil ngadto sa pagkamasinugtanon, pinaagi sa pulong ug sa buhat—pinaagi sa gahum sa mga milagro ug sa mga katingalahan, pinaagi sa gahum sa Espiritu Santo" (Romans 15:18, 19). Ang yawe mao ang pagkaanaa kang Cristo.

Ang Dios gusto magbuhat og dili-katuohan nga mga butang bisan karon. Ang Iyang mga plano milampas sa atong kaugalingon nga kapasidad. Lamang sa kanunay nga kadugtongan sa pag-ampo Kaniya kita makapadayon sa buhat nga Iyang giandam. Siya nagaawhag kanato, "Tawgon mo ako, ug ako motubag kanimo, ug magapakita kanimo ug dagkung mga butang, ug malisud, nga wala mo hibalo" (Jeremias 33:3).

Pag-ampo sa Pulong sa Dios

Mga tawhanong abilidad makahimo lamang og mga tawhanong resulta.

"Ug si Moises gitudloan sa tanang kaalam sa mga Egiptohanon ug siya makagagahum sa iyang mga pulong ug mga buhat. . . . Ug siya nagdahum nga ang iyang kaigsoonan nakasabut nga ang Dios naghatag kanilag kaluwasan pinaagi sa iyang kamot, apan wala diay sila makasabut. . . . Kanila ang nagpagula mao siya [Dios], nga nagbuhat ug mga kahibulongan ug mga ilhanan" (Buhat 7:22, 25, 36).

Pinalanggang Amahan, pangulohi kami sa pagtugyan sigon sa gibuhay ni Moises human sa iyang katuigan ingon nga usa ka magbalantay sa carnero. Nahibalo kamo nga Ikaw usab makahimo og mga timaan ug katingalahan pinaagi kanamo sa dihang kami magkinabuhi pinaagi sa gahum sa Balaang Espiritu. Himoa kaming masinugtanon sa pag-adto kon diin Mo kami pangulohan. Salamat sa Imong diosnong gahum.

Kita gilalang diha kang Cristo alang sa mga maayong binuhatan.

"Kay kita iyang mga binuhat, hinimo diha kang Cristo Jesus alang sa mga maayong binuhatan nga gilaraw nang daan sa Dios, aron nga niini managgawi kita" (Efeso 2:10).

Ginoo, himoa kaming mga galamiton diha sa Imong kamot alang sa kaluwasan ug panalangin sa among mga silingan. Nahibalo kami sa katumanan sa maayong balita nagasandig niini nga pangutana: Ako ba nagabuhat alang sa Dios uban sa akong tawhanong mga abilidad, o ang Dios nagabuhat pinaagi kanako uban sa Iyang mga diosnong abilidad? Tudloi kamo nga dili kami makaalagad kanimo sa among kinaugalingon. Salamat sa pagsaad sa pagbuhat pinaagi kanamo. Panalangini intawon ang buhat sa among mga kamot.

Dugang nga mga Suyot sa Pag-ampo

Mga Pasalamat ug Pagdayeg: Paghatag og mga pasalamat alang sa mga tino nga panalangin ug dayga ang Dios tungod sa Iyng kamaayo.

Kompisal: Paggahin og pipila ka mga minutos alang sa pribado nga kompisal ug pasalamat ang Dios tungod sa Iyang pagpasaylo.

Giya: Hangyos ang Dios sa paghatag og kaalam alang sa mga hagit karon ug sa mga desisyon.

Atong Iglesia: Hangyos ang Dios sa pagpanalangin sa mga pangabudlay sa atong iglesia sa lokal, rehiyon, ug sa tibuok kalibutan.

Lokal nga mga Hangyo: Iampo ang mga panginahanglanon karon sa atong mga membro sa iglesia, panimalay, ug mga silingan.

Pamati ug Responde: Paggahin og panahon sa pagpamati sa tingog sa Dios ug responde diha sa pagdayeg og awit.

Mga Sugyot nga Awit

SDA Hymnal: Take My Life and Let It Be (#330); Not I, But Christ (#570); Anywhere With Jesus (#508); Have Thine Own Way, Lord (#567). *Other Songs:* Make Me a Servant; In His Time.